

Letakkan sasaran 60 peratus pengundi Melayu jadi ahli

UM 20 JUN 2003

KUALA LUMPUR 19 Jun — UMNO perlu meletakkan sasaran menjadikan sekurang-kurangnya 60 peratus pengundi Melayu sebagai ahli UMNO bagi menjamin kemenangan dalam setiap pilihan raya.

Pengerusi Badan Perhubungan UMNO Negeri Melaka, Datuk Seri Ali Rustam berkata, sasaran itu tidak sukar dicapai kerana ketika ini, hampir 50 peratus daripada pengundi Melayu adalah ahli UMNO.

Menurutnya, ia juga tidak sukar untuk dijadikan realiti jika setiap ahli UMNO terutama kepimpinan di peringkat cawangan dan bahagian bekerja keras dan mengatur strategi yang berkesan.

“Jika seorang pemimpin UMNO menjaga 10 orang pengundi, saya rasa semua pengundi termasuk orang Cina dan India dalam jagan kita,” katanya ketika membahaskan usul ucapan dasar Presiden pada Perhimpunan Agung UMNO ke-54 di Pusat Dagangan Dunia Putra (PWTC) hari ini.

Ali berkata, jika sasaran itu dapat dicapai dan seterusnya Barisan Nasional (BN) dapat memenangi pilihan raya akan datang, ia akan merupakan hadiah perpisahan terbaik untuk Presiden UMNO, Datuk Seri Dr. Mahathir Mohamad.

Lebih istimewa lagi, katanya, ialah BN dapat merampas semula semua kerusi yang terlepas ke tan-

gan pembangkang dan merampas kerusi-kerusi yang menjadi ‘hak milik’ pembangkang selama ini.

Bagaimanapun, tegas beliau, dalam usaha menambah ahli, ahli-ahli UMNO termasuk yang baru juga perlu meningkatkan kesetiaan kepada parti seperti yang sentiasa ditekankan oleh Dr. Mahathir.

Katanya, kesetiaan amat penting dalam UMNO kerana hanya ia menjamin kemenangan dalam pilihan raya.

Penyelewengan

Selain itu, kata Ali, satu lagi cabaran besar bagi ahli UMNO ialah menghadapi penyelewengan agama yang terus dilakukan oleh Pas dari dahulu sehingga ke hari ini.

“Kita kena yakin bahawa Islam yang diamalkan oleh UMNO adalah ajaran Islam yang sebenar dan bukannya Islam yang dibawa oleh Pas.

“Bagi Pas, tidak ada cerita lain selain daripada

seks. Semua perkara dikaitkan dengan syahwat termasuk bersalam dengan wanita dan suara wanita yang membaca ayat Quran,” katanya.

Katanya, bagi UMNO, Islam mencukupi semua perkara dan pada hari ini, semua negara Islam telah mengiktiraf Malaysia sebagai sebuah negara Islam yang harus dicontohi.

Mengenai pengganti Dr. Mahathir, Ali berkata, UMNO Melaka akan memberikan sokongan yang sama kepada Datuk Seri Abdullah Ahmad Badawi seperti yang diberikan kepada Dr. Mahathir apabila beliau mengambil alih puncak pimpinan parti.

“Dr. Mahathir telah menentukan peralihan kuasa berlaku dengan licin dan baik dan UMNO Melaka berjanji akan memberikan sokongan yang padu kepada Pak Lah (Abdullah),” tegasnya.